



*Համարը* ՀՕ-176-Ն

*Տեսակը* Պաշտոնական  
Ինկորպորացիա

*Տիպը* Օրենք  
*Սկզբնաղբյուրը* ՀՀՊՏ 2007.05.23/26(550)  
Հոդ. 625

*Կարգավիճակը* Գործում է  
*Ընդունման վայրը* Երևան

*Ընդունող մարմինը* ՀՀ Ազգային ժողով  
*Ստորագրող մարմինը* ՀՀ Նախագահ  
*Վավերացնող մարմինը*  
*Ուժի մեջ մտնելու ամսաթիվը* 02.06.2007

*Ընդունման ամսաթիվը* 09.04.2007  
*Ստորագրման ամսաթիվը* 11.05.2007  
*Վավերացման ամսաթիվը*  
*Ուժը կորցնելու ամսաթիվը*

- [+ Կապեր այլ փաստաթղթերի հետ](#)
- [+ Փոփոխողներ և ինկորպորացիաներ](#)

ՀՀ ՕՐԵՆՔԸ ՈՐՄԻ ԵՎ ՈՐՍՈՐԴԱԿԱՆ ՏՆՏԵՍՈՒԹՅԱՆ ՎԱՐՄԱՆ ՄԱՍԻՆ

## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

# Օ Ր Ե Ն Ք Ը

Ընդունված է 2007 թվականի ապրիլի 9-ին

ՈՐՄԻ ԵՎ ՈՐՍՈՐԴԱԿԱՆ ՏՆՏԵՍՈՒԹՅԱՆ ՎԱՐՄԱՆ ՄԱՍԻՆ

Գ Լ ՈՒ Խ 1

### ԸՆԴՀԱՆՈՒՐ ԴՐՈՒՅԹՆԵՐ

#### Հոդված 1. Օրենքի կարգավորման առարկան

Սույն օրենքը կարգավորում է Հայաստանի Հանրապետության տարածքում որսի և որսորդական տնտեսության ոլորտի հասարակական հարաբերությունները՝ ապահովելով որսի կենդանիների պահպանության, պաշտպանության, վերարտադրության ու կայուն օգտագործման, որսահանդակների պահպանության ու բարելավման, որսի և որսորդական տնտեսության վարման իրավական հիմունքները, որսի օգտատիրոջ օրինական իրավունքների ձեռքբերման և կարգավորման պետական քաղաքականությունը:

#### Հոդված 2. Օրենքում օգտագործվող հիմնական հասկացությունները

Սույն օրենքում օգտագործվող հիմնական հասկացություններն են՝  
**կենսաստեղծիկական միջոցառումներ**՝ որսահանդակներում որսի կենդանիների կենսապայմանների բարելավմանն ու կենդանիների քանակի և տեսակային կազմի ավելացմանն ուղղված միջոցառումներ.  
**որս**՝ ազատ պայմաններում ապրող վայրի կենդանիների հայթայթում (որսորդություն, ձկնորսություն, հավաք)՝ Հայաստանի Հանրապետության օրենքով թույլատրված միջոցներով, եղանակներով, չափաքանակներով և ժամանակահատվածներով.  
**որսահանդակ**՝ որսի կենդանիների բնակության միջավայր՝ անտառային, դաշտային, ջրածածկ տարածքներ, որոնք օգտագործվում են որպես որս իրականացնելու վայր.  
**որսահանդակների գնահատում**՝ որսահանդակների բնավայրի (գետ, անտառ, մարգագետին և այլն) որակական

ընդհանուր գնահատական, որն արտահայտում է տվյալ տարածքի որսի և որսի կենդանիների համար դրանց պիտանիության աստիճանը.

**որսի անվանական թույլտվություն**՝ փաստաթուղթ, որն իրավունք է տալիս որսորդին իրականացնել որս՝ որսի հատուկ թույլտվություն պահանջող կենդանիների որոշակի տեսակի համար.

**որսի արգասիք**՝ որսի ընթացքում հայթայթած վայրի կենդանու միս, ալյուր, կաշի, մորթի, ոսկորներ, կենսագործունեության արդյունքներ, օրգաններ ու հյուսվածքներ, ինչպես նաև որսորդական հաղթանշան հանդիսացող մարմնի մասեր.

**որսի թույլտվություն**՝ որսահանդակներում որս իրականացնելու համար սույն օրենքով սահմանված կարգով տրված միանվագ կամ սեզոնային այցելության թույլտվություն, որտեղ նշվում են որսի վայրը, ձևը, այցելության ժամկետները, որսատեսակները և յուրաքանչյուր որսատեսակի քանակը.

**որսի կենդանիներ**՝ բնական ազատ պայմաններում ապրող, ինչպես նաև կիսաազատ պայմաններում պահվող վայրի կենդանիներ, որոնք օրենսդրությամբ սահմանված կարգով համարվում են որսի օբյեկտներ.

**որսի կենդանիների կայուն օգտագործում**՝ վայրի կենդանիների օգտագործման ձև, որը բավարարում է բնապահպանական, տնտեսական և սոցիալ-մշակութային պահանջները.

**որսի կենդանիների պետական կադաստր**՝ որսի կենդանիների տեսակային կազմի, քանակական և որակական բնութագրերի, վիճակի, բնապահպանական, մշակութային և տնտեսական արժեքների, աշխարհագրական և վարչատարածքային տարածվածության, ռեսուրսի և օգտագործման մասին տեղեկությունների ու փաստաթղթերի համակարգ.

**որսի կենդանիների պետական հաշվառում**՝ որսի կենդանիների տեսակային կազմի, թվաքանակի և նրանց տարածվածության որոշում.

**որսի կենդանիների պետական մոնիթորինգ**՝ որսահանդակներում և որսահանդակներից դուրս որսի կենդանիների պետական դիտանց՝ որսի կենդանիների տեսակների, թվաքանակի, վիճակի և տարածվածության վերաբերյալ.

**որսի կենդանիների ցանկ**՝ լիազորված մարմնի կողմից ընդունվող փաստաթուղթ, որտեղ նշվում են տվյալ տարվա ընթացքում որսի ենթակա կենդանիների տեսակը, քանակը և որսի ժամանակահատվածը.

**որսի հատուկ թույլտվություն պահանջող կենդանիների տեսակներ**՝ վայրի կենդանիներ, որոնց որսն իրականացվում է խիստ սահմանափակ քանակությամբ՝ միայն անվանական թույլտվությունների հիման վրա.

**որսի ռեսուրս**՝ Հայաստանի Հանրապետության տարածքում գոյություն ունեցող որսի կենդանիների ամբողջություն.

**որսի ռեսուրսի օգտագործում**՝ ֆիզիկական և իրավաբանական անձանց կողմից Հայաստանի Հանրապետության օրենքով սահմանված կարգով իրականացվող գործունեություն, որն ուղղված է որսի կենդանիների և նրանց արգասիքների օգտագործմանը.

**որսի օբյեկտ**՝ որսի կենդանիների ցանկում ընդգրկված վայրի կենդանի.

**որսի օգտատեր**՝ սույն օրենքով սահմանված կարգով որսորդական տնտեսություն վարելու իրավունք ստացած իրավաբանական կամ ֆիզիկական անձ.

**որսորդ**՝ ֆիզիկական անձ, որին սույն օրենքով սահմանված կարգով լիազորված մարմնի կողմից տրված է Հայաստանի Հանրապետության տարածքում որսորդությամբ զբաղվելու իրավունք.

**որսորդական մինիմում**՝ սույն օրենքի դրույթներին համապատասխան՝ որսի անվտանգության տեխնիկայի, որսորդական զենքի հետ վարվելու կանոնների և որսի կենդանիների կենսաբանական առանձնահատկությունների վերաբերյալ սիրողական որսի համար մշակված անհրաժեշտ գիտելիքների ամբողջություն.

**որսորդական վկայական**՝ որսով զբաղվելու իրավունքը հաստատող փաստաթուղթ.

**որսորդական տնտեսություն**՝ նպատակային առանձնացված տարածքում ստեղծված մասնագիտացված բնօգտագործող սուբյեկտ, որի գործունեության նպատակն է որսահանդակների և որսի կենդանիների կայուն օգտագործումը:

*(2-րդ հոդվածը փոփ. 02.02.10 ՀՕ-5-Ն)*

**Հոդված 3. Որսի կենդանիների պահպանությունը, պաշտպանությունը, վերարտադրությունը և կայուն օգտագործումը, որսահանդակների պահպանությունը և բարելավումը, որսի և որսորդական տնտեսության վարումը կարգավորող օրենսդրությունը**

1. Որսի կենդանիների պահպանության, պաշտպանության, վերարտադրության և կայուն օգտագործման, որսահանդակների պահպանության և բարելավման, որսի և որսորդական տնտեսության վարման բնագավառներում հասարակական հարաբերությունները կարգավորվում են «Կենդանական աշխարհի մասին» Հայաստանի Հանրապետության օրենքով, սույն օրենքով և իրավական այլ ակտերով:

2. Եթե Հայաստանի Հանրապետության միջազգային պայմանագրերում սահմանված են այլ նորմեր, քան նախատեսված են սույն օրենքով, ապա կիրառվում են միջազգային պայմանագրերի նորմերը:

**Հոդված 4.**

**Օրենքի նպատակը**

Սույն օրենքի նպատակն է՝

- 1) որսի կենդանիների պահպանության, պաշտպանության, վերարտադրության ու կայուն օգտագործման ապահովումը.
- 2) որսահանդակների պահպանությունը, ամբողջականության ապահովումը և բարելավումը.
- 3) որսորդական տնտեսությունների ստեղծումը և զարգացումը.
- 4) որսորդի և որսի օգտատիրոջ իրավունքների և պարտականությունների սահմանումը.
- 5) որսի կարգավորումը:

**Գ Լ ՈՒ Խ 2**

**ՈՐՍԻ ԵՎ ՈՐՍԻ ՌԵՍՈՒՐՍԻ ՕԳՏԱԳՈՐԾՄԱՆ ՕԲՅԵԿՏՆԵՐԸ, ՄԱՍՆԱԿԻՑՆԵՐԸ ԵՎ ԻՐԱՎՈՒՆՔՆԵՐԸ**

**Հոդված 5. Որսի և որսի ռեսուրսի օգտագործման օբյեկտները**

1. Որսի և որսի ռեսուրսի օգտագործման օբյեկտներ են համարվում որսի կենդանիները և որսահանդակների հետ մեկտեղ նաև դրանց օգտագործման իրավունքները:
2. Որսի կենդանիների ցանկը հաստատում և դրանց որսի համար նախատեսվող տարեկան օգտագործման թույլատրելի չափաքանակները սահմանում է Հայաստանի Հանրապետության լիազորված պետական մարմինը (այսուհետ՝ լիազորված մարմին):
3. Որսահանդակները կարող են գտնվել անտառային և գյուղատնտեսական նշանակության հողերի, ինչպես նաև ջրային տարածքների վրա:
4. Որսի կենդանիների օգտագործման իրավունքները տարանջատվում են դրանց բնակավայրերի և կեցության վայրերի (հող, ջուր, օդ, անտառ) օգտագործման իրավունքներից:
5. Անազատ և կիսաազատ պայմաններում վայրի կենդանիները պահելու և օգտագործելու կարգը սահմանվում է օրենքով:

*(5-րդ հոդվածը փոփ., լրաց. 02.02.10 ՀՕ-5-Ն)*

**Հոդված 6. Որսի և որսի ռեսուրսի օգտագործման փոխհարաբերությունների մասնակիցները**

Որսի և որսի ռեսուրսի օգտագործման փոխհարաբերությունների մասնակիցներն են՝

- 1) Հայաստանի Հանրապետության կառավարությունը.
- 2) լիազորված մարմինը.
- 3) պետական կառավարման տարածքային մարմինները.
- 4) տեղական ինքնակառավարման մարմինները.
- 5) ֆիզիկական և իրավաբանական անձինք.
- 6) Հայաստանի Հանրապետության և օտարերկրյա քաղաքացիները:

**Գ Լ ՈՒ Խ 3**

**ՈՐՍԻ, ՈՐՍԻ ԿԵՆԴԱՆԻՆԵՐԻ ԵՎ ՈՐՍՈՐԴԱԿԱՆ ՏՆՏԵՍՈՒԹՅԱՆ ՊԵՏԱԿԱՆ ԿԱՐԳԱՎՈՐՈՒՄԸ**

**Հոդված 7. Հայաստանի Հանրապետության կառավարության իրավասությունները**

Որսի կենդանիների և որսահանդակների պահպանության, պաշտպանության և կայուն օգտագործման, որսի և

որսորդական տնտեսության վարման բնագավառներում Հայաստանի Հանրապետության կառավարության իրավասություններն են՝

- 1) որսի կենդանիների և որսահանդակների պահպանության, պաշտպանության ու կայուն օգտագործման, որսի և որսորդական տնտեսության վարման բնագավառներում պետական քաղաքականության իրականացումը.
- 2) որսահանդակների ցանկի հաստատումը.
- 3) ոլորտին առնչվող պետական ծրագրերի հաստատումը.
- 4) *(կեսն ուժը կորցրել է 02.02.10 ՀՕ-5-Ն)*
- 5) որսի կենդանիների պետական կադաստրի և մոնիթորինգի վարման կարգերի սահմանումը.
- 6) որսորդական տնտեսության ստեղծման հանձնաժողովի աշխատակարգի սահմանումը և կազմի հաստատումը.
- 7) որսորդական տնտեսության ստեղծումը.
- 8) որսորդական տնտեսությունների համար հողամասի նկատմամբ վարձակալության վճարների սահմանումը.
- 9) որսորդական միևնույն կարգի սահմանումը.
- 10) Հայաստանի Հանրապետության օրենքով սահմանված այլ լիազորություններ:  
*(7-րդ հոդվածը փոփ. 02.02.10 ՀՕ-5-Ն)*

**Հոդված 8. Լիազորված մարմնի իրավասությունները**

Որսի կենդանիների և որսահանդակների պահպանության, պաշտպանության և կայուն օգտագործման, որսի և որսորդական տնտեսության վարման բնագավառում լիազորված մարմնի իրավասություններն են՝

- 1) ոլորտի քաղաքականության և ռազմավարության մշակումը.
- 2) պետական ծրագրերի մշակումը և իր լիազորության սահմաններում դրանց իրականացումը.
- 3) որսի կենդանիների և որսահանդակների պահպանության, պաշտպանության և կայուն օգտագործման, որսի և որսորդական տնտեսության վարման նկատմամբ վերահսկողության իրականացումը.
- 4) որսի կանոնների հաստատումը.
- 5) որսորդական վկայականի միասնական ձևի հաստատումը.
- 6) որսորդական միևնույն քննության կազմակերպումը և անցկացումը.
- 7) որսորդական վկայականի տրամադրումը.
- 8) որսի կենդանիների ցանկի հաստատումը, դրանց որսի համար նախատեսվող տարեկան օգտագործման թույլատրելի չափաքանակների և որսի ժամկետների սահմանումը.
- 9) որսի թույլտվությունների և պայմանագրերի օրինակելի ձևերի մշակումն ու հաստատումը.
- 10) որսի կենդանիների, այդ թվում՝ որսի հատուկ թույլտվություն պահանջող կենդանիների օգտագործման թույլտվությունների տրամադրումը և պայմանագրերի կնքումը.
- 11) որսի ընթացքում ձեռք բերված կամ օրինական ճանապարհով գնված արգասիքները Հայաստանի Հանրապետության տարածքից արտահանելու և Հայաստանի Հանրապետության տարածք ներմուծելու թույլտվությունների տրամադրումը.
- 12) որսի կենդանիների պետական կադաստրի վարումը.
- 13) որսի կենդանիների պետական հաշվառման կազմակերպումը և իրականացումը.
- 14) որսի կենդանիների պետական մոնիթորինգի կազմակերպումն ու վարումը.
- 15) որսորդական տնտեսություն ստեղծելու մրցույթի անցկացումը.
- 16) որսի ռեսուրսի օգտագործման պայմանագրի կնքումը և որսորդական տնտեսություն վարելու իրավունքի տրամադրումը.
- 17) որսորդական տնտեսության վարման և զարգացման ծրագրերի հաստատումը.
- 18) օրենքով սահմանված կարգով որսորդների կամ որսի օգտատերերի հետ կնքված թույլտվություններն ու պայմանագրերը լուծելը.
- 19) որսորդական տնտեսության վարման մասին անհրաժեշտ տեղեկատվություն ստանալը.
- 20) իր իրավասության սահմաններում միջազգային համագործակցության իրականացումը.
- 21) պետական անտառներում և անտառային ֆոնդի հողերում սույն հոդվածի 2-րդ և 20-րդ կետերով սահմանված իրավասությունները դրանց կառավարումն իրականացնող պետական կառավարման մարմնին զիջելը.
- 22) Հայաստանի Հանրապետության օրենսդրությամբ սահմանված այլ լիազորություններ:

**Հոդված 9. Պետական կառավարման տարածքային մարմինների իրավասությունները**

Հայաստանի Հանրապետությունում որսի կենդանիների և որսահանդակների պահպանության, պաշտպանության և

կայուն օգտագործման, որսի և որսորդական տնտեսության վարման բնագավառներում պետական կառավարման տարածքային մարմինների իրավասություններն են՝

- 1) մասնակցությունը պետական ծրագրերի մշակմանը և իրենց իրավասության սահմաններում դրանց իրականացմանը.
- 2) մասնակցությունը որսորդական տնտեսություն վարելու իրավունքի տրամադրման, մրցույթի անցկացման հանձնաժողովի աշխատանքներին.
- 3) որսի կենդանիների և որսահանդակների պահպանության, պաշտպանության, բարելավման և կայուն օգտագործման, որսի և որսորդական տնտեսության վարման բնագավառներում համապատասխան պետական մարմինների տարածքային ծառայությունների գործունեության աջակցումը՝ օրենքով իրենց տրված լիազորությունների սահմաններում.
- 4) որսագողության դեմ կազմակերպվող միջոցառումներին աջակցելը.
- 5) Հայաստանի Հանրապետության օրենսդրությամբ սահմանված այլ լիազորություններ:

**Հոդված 10. Տեղական ինքնակառավարման մարմինների իրավասությունները**

Հայաստանի Հանրապետությունում որսի կենդանիների և որսահանդակների պահպանության, պաշտպանության և կայուն օգտագործման, որսի և որսորդական տնտեսության վարման բնագավառներում տեղական ինքնակառավարման մարմինների իրավասություններն են՝

- 1) մասնակցությունը պետական ծրագրերի մշակմանը.
- 2) մասնակցությունը որսահանդակների և կենդանական աշխարհի օգտագործման և պահպանության միջոցառումների կազմակերպմանը.
- 3) օրենքով սահմանված այլ լիազորություններ:

**Գ Լ ՈՒ Խ 4**

**ՈՐՍՈՐԴԱԿԱՆ ՏՆՏԵՍՈՒԹՅՈՒՆ**

**Հոդված 11. Որսորդական տնտեսության ստեղծումը և լուծարումը**

1. Պետության և համայնքային սեփականություն համարվող հողամասերում որսորդական տնտեսություն կազմակերպելու համար առանձնացվող տեղամասերը և դրանց չափերը հաստատում է Հայաստանի Հանրապետության կառավարությունը՝ օրենքով սահմանված կարգով:

2. Որսորդական տնտեսությունը կարող է ստեղծվել անտառային, ջրային տարածքների, գյուղատնտեսական նշանակության հողերի վրա:

3. Որսորդական տնտեսություններ չեն կարող ստեղծվել հատուկ պահպանվող տարածքներում:

4. Պետության և համայնքային սեփականություն համարվող հողամասերում որսորդական տնտեսություն ստեղծելու առաջարկությունը հայտատերը նախապատրաստում և ներկայացնում է Հայաստանի Հանրապետության կառավարության հաստատմանը՝ օրենքով և այլ իրավական ակտերով սահմանված կարգով: Որսորդական տնտեսության ստեղծման առաջարկության մեջ նշվում են որսորդական տնտեսության տեղադիրքը, տարածքի չափը, հողամասի նպատակային նշանակությունը և դրա օգտագործման նկատմամբ պահանջներն ու սահմանափակումները, որսահանդակի գնահատման տվյալները:

5. Պետության և համայնքային սեփականություն համարվող հողամասերը որսորդական տնտեսություն կազմակերպելու համար հատկացվում են վարձակալության և կառուցապատման իրավունքով՝ մրցութային կարգով:

6. Մրցույթն անցկացնելու համար Հայաստանի Հանրապետության կառավարության կողմից ստեղծվում է մրցութային հանձնաժողով լիազորված մարմնի ներքո՝ մարզպետարանների և համապատասխան գիտական և հասարակական կազմակերպությունների լիազորած մասնագետների մասնակցությամբ:

7. Պետության և համայնքների սեփականություն համարվող հողամասերի մրցույթում հաղթող ճանաչված հայտատերերի հետ կնքվում է համապատասխան հողօգտագործման պայմանագիր:

8. Որսորդական տնտեսություններ կարող են կազմակերպվել նաև ֆիզիկական և իրավաբանական անձանց սեփականություն համարվող հողամասերի վրա՝ Հայաստանի Հանրապետության քաղաքացիական օրենսգրքով սահմանված կարգով, սույն օրենքի պահանջներին համապատասխան, որի դեպքում հողօգտագործման պայմանագիրը կնքվում է հողի սեփականատիրոջ կամ նրա լիազորած անձի հետ՝ օրենքով սահմանված կարգով:

9. Որսորդական տնտեսության տարածքներում թույլատրվում է տեղադրել մինչև 50 քմ տիպային կառույցներ, որոնց

նախագծերը հաստատում է քաղաքաշինության բնագավառում լիազորված պետական կառավարման մարմինը, առանց հողերի նպատակային նշանակության փոփոխության: Նշված տարածքներում այլ տիպի շինությունների կառուցումը կատարվում է Հայաստանի Հանրապետության օրենքով սահմանված կարգով:

10. Որսորդական տնտեսությունը լուծարում է Հայաստանի Հանրապետության կառավարությունը՝ օրենսդրությամբ սահմանված կարգով:

**Հոդված 12. Որսորդական տնտեսություն վարելու իրավունքի տրամադրումը**

Որսորդական տնտեսություն վարելու իրավունք տրվում է որսորդական տնտեսություն կազմակերպելու համար մրցույթում հաղթող ճանաչված և հողօգտագործման պայմանագիր կնքած ֆիզիկական կամ իրավաբանական անձին, որը սույն օրենքով սահմանված կարգով լիազորված մարմնի հետ կնքել է որսի ռեսուրսի օգտագործման պայմանագիր:

**Հոդված 13. Որսորդական տնտեսության վարումը**

Որսի օգտատերն իրականացնում է որսորդական տնտեսության վարումը, որը ներառում է հետևյալ գործառնությունները.

- 1) որսի կենդանիների պահպանությունը, պաշտպանությունը, վերարտադրությունն ու կայուն օգտագործումը.
- 2) որսահանդակների որակի պահպանումն ու բարելավումը.
- 3) որսահանդակների գնահատումը և կենդանիների հաշվառումը.
- 4) կենդանիների քանակի կարգավորումը օրենքով սահմանված կարգով՝ ըստ որսահանդակի տարողության՝ ապահովելով կենդանիների կողմից բնության վրա բացասական ազդեցության նվազեցումը.
- 5) կենդանիների բնականոն զարգացումը և վերարտադրությունն ապահովող անհրաժեշտ տարածքների և պայմանների առանձնացումը.
- 6) կենսատեխնիկական միջոցառումների իրականացումը.
- 7) որսորդների կենցաղային պայմանների և որսի իրականացման անհրաժեշտ պայմանների ապահովումը:

**Հոդված 14. Որսորդական տնտեսության օգտագործումը և օգտագործման համար վճարումները**

1. Որսորդական տնտեսության օգտագործումը վճարովի է: Վճարումների կարգը և չափերը սահմանվում են Հայաստանի Հանրապետության օրենսդրությամբ և համապատասխան պայմանագրով: Վճարները ներառում են որսորդական տնտեսության գույքի, նրա զբաղեցրած հողամասի վարձակալության, որսի ռեսուրսի օրյեկտների օգտագործման համար բնօգտագործման և դրանց հետ կապված ծառայությունների դիմաց գանձվող վճարները:

2. Հայաստանի Հանրապետության կառավարությունը պետության սեփականություն համարվող հողամասերում նոր ստեղծված որսորդական տնտեսություններին խրախուսելու նպատակով կարող է դրանց ազատել հողամասի վարձավճարից՝ հողամասի տրամադրման պահից մինչև 10 տարի ժամկետով:

3. Հողամասի նկատմամբ վարձակալության վճարներ նախատեսվում են որսորդական տնտեսության միայն անտառապատ և (կամ) այն հատվածների համար, որոնք, բացի որսորդությունից, օգտագործելի են նաև կենցաղային կամ տնտեսական այլ նպատակների համար, իսկ մյուս հատվածների համար վարձակալության վճարներ չեն սահմանվում:

4. Սույն հոդվածով սահմանված գույքային իրավունքները ենթակա են պետական գրանցման՝ «Գույքի նկատմամբ իրավունքների պետական գրանցման մասին» Հայաստանի Հանրապետության օրենքով սահմանված կարգով:

**Հոդված 15. Որսորդական տնտեսությունից օգտվելու համար վճարումները**

- 1. Որսորդական տնտեսությունում որսը և դրա հետ կապված ծառայությունների մատուցումը վճարովի է:
- 2. Որսի կենդանիների օգտագործման վճարները (բնօգտագործման վճարները) և որսի հետ կապված ծառայությունների համար վճարումներն իրականացվում են Հայաստանի Հանրապետության օրենսդրությամբ սահմանված կարգով:
- 3. Որսորդական տնտեսություններում ծառայությունների մատուցման համար վճարի չափերը սահմանվում են պայմանագրային հիմունքներով:

**Գ Լ ՈՒ Խ 5**

**ՈՐՄԻ ԻՐԱՎՈՒՆՔԸ ԵՎ ՈՐՍՈՐԴԻ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ**

**Հոդված 16. Որսի իրավունքը**

Հայաստանի Հանրապետության տարածքում որսի իրավունք ունեն՝

- 1) 18 տարին լրացած Հայաստանի Հանրապետության այն քաղաքացիները, ովքեր սույն օրենքով սահմանված կարգով հանձնել են որսորդական մինիմում և օրենքով սահմանված կարգով ստացել են սույն օրենքի 19-րդ հոդվածում նշված՝ որս կատարելու անհրաժեշտ փաստաթղթեր.
- 2) օտարերկրյա այն քաղաքացիները, ովքեր Հայաստանի Հանրապետության օրենսդրությամբ սահմանված կարգով ձեռք են բերել որսորդական զենք կրելու և որս իրականացնելու իրավունք:

**Հոդված 17. Որսորդական վկայականը**

Հայաստանի Հանրապետության տարածքում գործում է լիազորված մարմնի հաստատած միասնական ձևի որսորդական վկայական: Որսորդական վկայականը տրվում է լիազորված մարմնի կողմից որսորդական մինիմումի քննությունը հանձնած և օրենքով սահմանված կարգով ու չափով պետական տուրք մուծած քաղաքացիներին:

**Հոդված 18. Որսորդական մինիմումը**

Որսորդական մինիմումը սահմանում է Հայաստանի Հանրապետության կառավարությունը: Որսորդական մինիմումի քննությունը ընդունում է լիազորված մարմնի ստեղծած մասնագիտական հանձնաժողովը:

**Հոդված 19. Որս կատարելու անհրաժեշտ փաստաթղթերը**

Որս կատարելու անհրաժեշտ փաստաթղթերն են՝

- 1) որսորդական զենք կրելու վկայականը.
- 2) կենդանիների որսի թույլտվությունը.
- 3) որսորդական վկայականը:

**Հոդված 20. Որսի կանոնները**

Որսի կանոնները հաստատվում են սույն օրենքով սահմանված կարգով և ներառում են՝

- 1) որսի ժամկետները և միջոցները.
- 2) որսի օբյեկտ համարվող կենդանիների ցանկը.
- 3) կենդանիների որսի սահմանային թույլատրելի չափաքանակները.
- 4) որսի արգելված ձևերը, միջոցները, մեթոդները և գործիքները.
- 5) որսի արգելված տարածքների ցանկը.
- 6) օգտագործման հանձնված որսորդական տնտեսությունների և որսահանդակների ցանկը:  
(20-րդ հոդվածը լրաց. 04.02.10 ՀՕ-18-Ն)

**Հոդված 21. Որսի թույլատրելի ձևերը և միջոցները**

Հայաստանի Հանրապետության տարածքում իրականացվում է սիրողական (անհատական և կոլեկտիվ) որս: Որսի ընթացքում կարող են օգտագործվել օրենքով սահմանված կարգով որսորդական ողորկափող և ակոսավոր հրազեն, որսորդական սառը գենք: Սույն օրենքով որպես թույլատրված որսամիջոցներ են համարվում որսորդական շները, որսկան թռչունները, խայծերը, խրտվիլակները, թաքստոցները և թիվ 5-ից ոչ խոշոր թակարդները:

*(21-րդ հոդվածը լրաց. 04.02.10 ՀՕ-18-Ն)*

**Հոդված 21.1. Որսի արգելված ձևերը, միջոցները, գործիքները և սահմանափակումները**

Հայաստանի Հանրապետության տարածքում արգելվում է որս իրականացնել՝

- 1) առանց սույն օրենքով սահմանված փաստաթղթերի առկայության.
- 2) որսահանդակների տարածքներից դուրս.
- 3) բնության հատուկ պահպանվող տարածքներում, բացառությամբ Հայաստանի Հանրապետության օրենսդրությամբ սահմանված դեպքերի.
- 4) որսի կանոններով չնախատեսված որսագործիքներ օգտագործելով.
- 5) բնակավայրերին, հանգստի գոտիներին և ավտոմայրուղիներին մոտ տարածքներում՝ որսորդական ակոսավոր հրազենով, ոչ պակաս, քան 5000 մետր, իսկ ողորկափող հրազենով՝ 500 մետր հեռավորությունից.
- 6) գյուղատնտեսական նշանակության հողերում՝ մինչև բերքահավաքի ավարտը.
- 7) որսի թույլտվության մեջ նշված չափաքանակներից ավել վայրի կենդանիների, թույլտվությունում չնշված վայրի կենդանիների տեսակների, թույլտվությունում նշված որսի ժամկետներից դուրս.
- 8) Բնության պահպանության միջազգային միության ցանկում գրանցված վտանգված վայրի կենդանիների վրա, բացառությամբ օրենքով սահմանված դեպքերի.
- 9) աղետալի վիճակում գտնվող կամ բնական աղետներից փրկվող վայրի կենդանիների վրա.
- 10) վայրի կենդանիների ձվերի և ձագերի հավաքմամբ, դրանց բների ու որջերի քանդմամբ և հավաքատեղերի վնասմամբ և ոչնչացմամբ.
- 11) վերգետնյա, օդային (ուղղաթիռ, ինքնաթիռ, պարաշյուտ և այլն) և ջրային մեխանիկական (մոտորացված) տրանսպորտային միջոցներից վայրի կենդանիներին հետապնդելով.
- 12) որսի համար օրենքով չնախատեսված, օրենքով սահմանված կարգով չհաշվառված կամ ապօրինի պատրաստված գենքի, օբյեկտների պահպանության համար հատկացված հրազենի կիրառմամբ.
- 13) մարտական գենքի և մարտական փամփուշտների, ինքնանետերի, ինքնաձիգ հրացանների, օդամղիչ գենքի, ռազմական ակոսավոր գենքի և ազդանշանային հրթիռների գործադրմամբ.
- 14) աղեղների, կեռչանների, ցանցերի, օղակների, ծուղակների, որսափոսերի և թիվ 5-ից խոշոր թակարդների օգտագործմամբ.
- 15) պայթուցիկ և քիմիական նյութերի (բացառությամբ հոտավետ խայծերի), գազերի և էլեկտրական հոսանքի գործադրմամբ.
- 16) գիշերային ժամերին լուսարձակների կամ լուսային այլ հզոր սարքավորումների (աղբյուրների) կիրառմամբ.
- 17) բուսական ծածկի այրմամբ կամ ծխի օգտագործման միջոցով.
- 18) ձայնարձակիչների կամ ձայն վերարտադրող էլեկտրոնային (ոչ մեխանիկական) սարքերի գործադրմամբ.
- 19) վայրի կենդանիների զանգվածային վնասման այլ եղանակներով:

*(21.1-ին հոդվածը լրաց. 04.02.10 ՀՕ-18-Ն)*

**Հոդված 22. Որսորդի իրավունքները**

Որսորդն իրավունք ունի՝

- 1) Հայաստանի Հանրապետության տարածքում իրականացնելու որս՝ սույն օրենքով սահմանված կարգով.
- 2) դառնալու հասարակական որսորդական կազմակերպությունների կամ միավորումների հիմնադիր կամ անդամ.
- 3) տնօրինելու իր հայթայթած որսի կենդանիները և արգասիքները:

**Հոդված 23. Որսորդի պարտականությունները**

Որսորդը պարտավոր է՝

- 1) կատարել բնապահպանական, կենդանական աշխարհի պահպանության նորմերով, սույն օրենքով և որսի

կանոններով ամրագրված դրույթները.

2) մասնակցել կենսատեխնիկական միջոցառումների իրականացմանը:

**Հոդված 24. Որսորդին որսի իրավունքից զրկելը**

Որսորդի՝ որս կատարելու իրավունքը դադարեցվում է սույն օրենքով սահմանված կանոնների խախտման դեպքում:

**Գ Լ ՈՒ Խ 6**

**ՈՐՍԻ ՕԳՏԱՏԻՐՈՋ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ**

**Հոդված 25. Որսի օգտատիրոջ իրավունքները**

Որսի օգտատերն իրավունք ունի՝

- 1) տնօրինելու իրեն տրամադրված որսահանդակը և վարելու որսորդական տնտեսություն՝ համաձայն որսորդական տնտեսության վարման համար տարածքը տրամադրելու պայմանագրի.
- 2) իրականացնելու որսահանդակների օգտագործում՝ համաձայն պայմանագրում ամրագրված տարածքների, ժամկետների, օգտագործման ձևերի և ծավալների.
- 3) ստանալու որսի ռեսուրսի օգտագործման թույլտվություն.
- 4) պայմանագրային պայմաններին համապատասխան՝ սահմանելու անցակետեր, վերարտադրության տեղամասեր, կերակրման կետեր, կենդանիների բնականոն զարգացման համար առանձնացված հանգստի գոտիներ և իրականացնելու այլ կենսատեխնիկական միջոցառումներ.
- 5) տնտեսության զարգացման նպատակով սահմանված կարգով իրականացնել որսորդական տնակների, թաքստոցների, դիտակետերի, կառույցների, ճանապարհների և այլ օբյեկտների կառուցում՝ համաձայնեցնելով համապատասխան լիազոր մարմնի հետ.
- 6) սեփական միջոցներով վարելու որսի կենդանիների հաշվառում և դրա արդյունքների հիման վրա լիազորված մարմնին ներկայացնելու որսի կենդանիների օգտագործման հայտ.
- 7) իրականացնելու որսի կենդանիների վերարտադրման աշխատանքները «Կենդանական աշխարհի մասին» Հայաստանի Հանրապետության օրենքին համապատասխան՝ լիազոր մարմնի թույլտվության առկայության դեպքում.
- 8) ստանալու վճարներ որսի կազմակերպման և դրա հետ կապված այլ ծառայությունների համար.
- 9) իրեն ամրագրված որսահանդակներում ինքնուրույն իրականացնելու որսորդական տնտեսության գործունեություն՝ սույն օրենքով սահմանված իր պարտավորություններին, որսորդական տնտեսության զարգացման ծրագրերին և որսի կանոններին համապատասխան.
- 10) իրականացնելու հսկողություն իրեն տրամադրված տարածքում.
- 11) տեղադրելու ցուցանակներ, վահանակներ և ուղեփակոցներ.
- 12) մշակելու և վերամշակելու անասնաբուժասանիտարական փորձաքննության ենթարկված որսի արգասիքը.
- 13) վաճառելու որսի արգասիքը և դրա մշակումից ու վերամշակումից ստացված արտադրանքը.
- 14) տնօրինելու որսի արգասիքից և դրա վաճառքից առաջացած եկամուտը.
- 15) իրավաբանական անձանց և քաղաքացիների, այդ թվում՝ օտարերկրյա քաղաքացիների հետ կնքելու պայմանագրեր՝ որս իրականացնելու նպատակով ծառայություններ տրամադրելու մասին.
- 16) վերարտադրության և կլիմայավարժեցման նպատակով անագատ և կիսագատ պայմաններում պահելու վայրի կենդանիներ, այդ թվում՝ Հայաստանի Հանրապետության Կարմիր գրքում գրանցված.
- 17) համաձայնեցնելով լիազորված մարմնի հետ՝ սահմանելու որսի այլ ժամկետներ, որսի կենդանիների այլ տեսակներ և քանակություններ.
- 18) զանգվածային լրատվության միջոցներով գովազդելու որսորդական տնտեսության գործունեությունը և մատուցվող ծառայությունները.
- 19) վաղաժամ լուծելու պայմանագիրը՝ համաձայն գործող օրենսդրության և պայմանագրի դրույթների:

**Հոդված 26. Որսի օգտատիրոջ պարտականությունները**

Որսի օգտատերը պարտավոր է՝

- 1) կատարել բնապահպանական նորմերով, «Կենդանական աշխարհի մասին» Հայաստանի Հանրապետության օրենքով, սույն օրենքով ամրագրված պահանջները.
- 2) տրամադրված որսահանդակն օգտագործել ըստ նպատակի՝ համաձայն պայմանագրի.
- 3) կատարել պայմանագրի և թույլտվության մեջ նշված պարտականությունները.
- 4) ժամանակին մուծել օրենքով սահմանված վճարները.
- 5) իրականացնել կենսատեխնիկական միջոցառումներ՝ ուղղված որսորդական տնտեսության զարգացմանը, որսահանդակների պահպանությանը և բարելավմանը, վայրի կենդանիների պաշտպանությանը, բազմացմանը և կայուն օգտագործմանը.
- 6) աջակցել իրեն տրամադրված տարածքում որսի կանոնների կատարմանը և որսագողության կանխմանը.
- 7) որսի արգասիքների տեղափոխման և իրացման գործընթացներն իրականացնել օրենսդրությամբ և այլ իրավական ակտերով սահմանված ուղեկցող փաստաթղթերի առկայության դեպքում.
- 8) վեց ամիսը մեկ լիազորված մարմնին տրամադրել անհրաժեշտ տեղեկատվություն՝ որսորդական տնտեսություն վարելու մասին.
- 9) թույլ չտալ այլ հողօգտագործողների իրավունքների խախտում.
- 10) աշխատանքներն իրականացնել՝ բացառելով որսահանդակի վիճակի վատթարացումը.
- 11) պահպանել որսի կանոնները, սահմանված ժամկետները, ձևերը, չափաքանակները և միջոցները.
- 12) մշտապես իրականացնել միջոցառումներ՝ ուղղված որսահանդակների և որսի կենդանիների պահպանությանը.
- 13) մշակել և պայմանագրով սահմանված ժամկետում լիազորված մարմնի հաստատմանը ներկայացնել որսորդական տնտեսության վարման և զարգացման ծրագիրը.
- 14) որսորդական տնտեսության ստեղծման պահից մեկ տարվա ընթացքում համապատասխան վահանակներով նշել տարածքի սահմանները և պահպանել դրանց վիճակը.
- 15) բնությանը և կենդանիներին իր մեղքով հասցրած վնասի համար փոխհատուցել Հայաստանի Հանրապետության օրենքով սահմանված կարգով:

**Հոդված 27. Որսի օգտատիրոջ գործունեության դադարեցումը**

Որսի օգտատիրոջ գործունեությունը դադարեցվում է՝

- 1) տարածքը տրամադրելու պայմանագրի ժամկետը լրանալու կամ լուծելու,
- 2) որսի թույլտվության ու որսի ռեսուրսի օգտագործման պայմանագրի ժամկետը լրանալու կամ լուծելու,
- 3) իրավաբանական անձի լուծարման,
- 4) որսորդական տնտեսության լուծարման դեպքերում:

**Գ Լ ՈՒ Խ 7**

*ՈՐՍԻ ԵՎ ՈՐՍՈՐԴԱԿԱՆ ՏՆՏԵՍՈՒԹՅԱՆ ՏՆՏԵՍԱԿԱՆ ԿԱՐԳԱՎՈՐՈՒՄԸ*

**Հոդված 28. Որսի կենդանիների օգտագործման թույլտվությունները**

Որսի կենդանիների օգտագործման համար տրվում են հետևյալ թույլտվությունները.

- 1) երկարաժամկետ թույլտվություն՝ լիազորված մարմնի կողմից տրվում է օգտատիրոջը մինչև 50 տարի ժամկետով՝ որսորդական տնտեսության օգտագործման պայմանագրի հիման վրա և օգտատիրոջը թույլ է տալիս օգտագործել տարածքի որսորդական կենդանիները՝ համաձայն թույլտվության մեջ սահմանված տեսակների, քանակների և ժամկետների.
- 2) կարճաժամկետ թույլտվություն՝ լիազորված մարմնի կամ օգտատիրոջ կողմից տրվում է որսորդին որսի հատուկ թույլտվություն չպահանջող կենդանիների տեսակների որսի համար՝ կոնկրետ վայրում և ժամանակահատվածում.
- 3) անվանական թույլտվություն՝ լիազորված մարմնի կամ օգտատիրոջ կողմից տրվում է որսորդին՝ լիազորված մարմնի հետ համաձայնեցնելով կենդանու տեսակի որսի համար հատուկ թույլտվությունը՝ կոնկրետ վայրում և ժամանակահատվածում:

**Գ Լ ՈՒ Խ 8**

*ՈՐՍԻ ԿԵՆԴԱՆԻՆԵՐԻ ՊԱՀՊԱՆՈՒԹՅԱՆ, ՊԱՇՏՊԱՆՈՒԹՅԱՆ, ՎԵՐԱՐՏԱԴՐՈՒԹՅԱՆ ԵՎ ՈՐՍԱՀԱՆԴԱԿԱՆԵՐԻ ՊԱՀՊԱՆՈՒԹՅԱՆ ՈՒ ԲԱՐԵԼԱՎՄԱՆ ԽՆԴԻՐՆԵՐԸ*

**Հոդված 29. Որսի կենդանիների պահպանության, պաշտպանության և վերարտադրության խնդիրները**

Որսի կենդանիների պահպանության, պաշտպանության և վերարտադրության խնդիրները կարգավորվում են «Կենդանական աշխարհի մասին» Հայաստանի Հանրապետության օրենքով և սույն օրենքով:

**Հոդված 30. Որսահանդակների պահպանության և բարելավման խնդիրները**

Որսահանդակների պահպանության և բարելավման խնդիրներն են՝

- 1) ապահովել որսահանդակների բազմազանության ամբողջականության պահպանությունը.
- 2) նպաստել որսահանդակների նպատակային օգտագործմանը.
- 3) որսահանդակների նպատակային օգտագործումն իրականացնել՝ հաշվի առնելով այդ տարածքների արժեքը որպես որսի կենդանիների բնակության միջավայր՝ պահպանելով և բարելավելով դրանց բնապահպանական և կենդանիների վերարտադրության պոտենցիալը.
- 4) որսահանդակները որսի և տնտեսական նպատակներով շահագործելիս ապահովել Հայաստանի Հանրապետության օրենսդրության պահանջների կատարումը.
- 5) կանխել որսահանդակներում և որսահանդակներից դուրս օտարածին վայրի կենդանիների ներմուծումը:

**Հոդված 31. Որսի կենդանիների պետական մոնիթորինգը**

Որսի կենդանիների պետական մոնիթորինգը նպաստում է որսի կենդանիների քանակության պահպանությանը և որսաչափերի սահմանմանը և անհրաժեշտ կենսատեխնիկական միջոցառումների պլանավորմանը: Որսի կենդանիների պետական մոնիթորինգն իրականացվում է որսի կենդանիների տարածվածության, քանակի, վիճակի, ինչպես նաև դրանց բնակավայրերի և կեցության վայրերի որակի գնահատման, բացասական երևույթների ժամանակին հայտնաբերման, կանխարգելման և վերացման նպատակով:

**Հոդված 32. Որսի կենդանիների պետական հաշվառումը և կադաստրը**

Որսի կենդանիների պետական հաշվառման և կադաստրի վարման նպատակն է բացահայտել որսի կենդանիների տեսակների, դրանց ապրելավայրերի քանակական և որակական փոփոխությունները և դրանց գրանցումը: Որսի կենդանիների պետական հաշվառումն իրականացվում է ամեն տարի մինչև որսի ժամկետների (որսաշրջանի) սկիզբը:

**Գ Լ ՈՒ Խ 9**

*ՈՐՍԻ ԿԵՆԴԱՆԻՆԵՐԻ ՊԱՀՊԱՆՈՒԹՅԱՆ, ՈՐՍՈՐԴԱԿԱՆ ՏՆՏԵՍՈՒԹՅԱՆ ԵՎ ՈՐՍԻ ՄԱՍԻՆ ՕՐԵՆՍՊՐՈՒԹՅՈՒՆԸ ԽԱՆՏԵԼՈՒ ՀԱՄԱՐ ՊԱՏԱՍԽԱՆԱՏՎՈՒԹՅՈՒՆԸ*

**Հոդված 33. Որսի կենդանիների, որսորդական տնտեսության և որսի մասին օրենսդրությունը խախտելու համար պատասխանատվությունը**

Որսի կենդանիների, որսորդական տնտեսության և որսի մասին օրենսդրության խախտումն առաջ է բերում պատասխանատվություն՝ Հայաստանի Հանրապետության օրենքով սահմանված կարգով:

**Գ Լ ՈՒ Խ 10**

*ԱՆՅՈՒՄԱՅԻՆ ԴՐՈՒՅԹ*

Հոդված 34.

**Օրենքի ուժի մեջ մտնելը**

Սույն օրենքն ուժի մեջ է մտնում պաշտոնական հրապարակմանը հաջորդող տասներորդ օրվանից:

**Հայաստանի Հանրապետության  
Նախագահ**

**Ռ. Քոչարյան**

2007 թ. մայիսի 11  
Երևան  
ՀՕ-176-Ն